

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱՌՈՂՋԱՊԱՀՈՒԹՅԱՆ ՆԱԽԱՐԱՐ
ՀՐԱՄԱՆ

ք. Երևան

N 2587 - Ա

« 07 » նոյեմբեր 2014թ.

2015 ԹՎԱԿԱՆԻ ԲԺՇԿԱԿԱՆ ՕԳՆՈՒԹՅԱՆ ԵՎ ՍՊԱՍԱՐԿՄԱՆ
ՊԵՏԱԿԱՆ ՊԱՏՎԵՐԻ ՏԵՂԱԴՐՄԱՆ ԿԱՐԳԸ ՍԱՀՄԱՆԵԼՈՒ ՄԱՍԻՆ

Հիմք ընդունելով Հայաստանի Հանրապետության կառավարության 2004 թվականի մարտի 4-ի թիվ 318-Ն որոշման հավելված թիվ 2-ի 10-րդ կետը, Հայաստանի Հանրապետության կառավարության 2002 թվականի օգոստոսի 15-ի թիվ 1300-Ն որոշմամբ հաստատված Հայաստանի Հանրապետության առողջապահության նախարարության կանոնադրության 12-րդ կետի «դ» ենթակետը, պետության կողմից երաշխավորված անվճար և արտոնյալ պայմաններով բժշկական օգնության և սպասարկման (այսուհետ՝ պետական պատվեր) գործընթացի կազմակերպման կանոնակարգման նպատակով

Հ Ր Ա Մ Ա Յ ՈՒ Մ Ե Մ.

1. Սահմանել բժշկական օգնության և սպասարկման պետական պատվերի տեղադրման կարգը՝ համաձայն հավելված 1-ի:

2. Ստեղծել բժշկական օգնության և սպասարկման 2015 թվականի պետական պատվերի տեղադրման հանձնաժողով (այսուհետ՝ Հանձնաժողով) և հաստատել դրա կազմը՝ համաձայն հավելված N 2-ի:

3. Հաստատել՝

1) Հանձնաժողովի աշխատակարգը՝ համաձայն հավելված N 3-ի,

2) պարզ ընթացակարգով տեղադրվող պետական պատվերի շրջանակներում իրականացվող բժշկական օգնության և սպասարկման հաստատագրված տեսակները և ծառայությունները՝ համաձայն հավելված N 4-ի,

3) պետության կողմից երաշխավորված բժշկական օգնության և սպասարկման ծառայությունների մատուցման պայմանագրերի առանձին օրինակելի պայմանները՝ համաձայն հավելված N 5-ի,

4) 2015 թվականին բժշկական կազմակերպություններում բժշկական օգնության և սպասարկման պետական պատվերի տեղադրման հայտի ներկայացման ու պետական պատվերի տեղադրման ժամանակացույցը՝ համաձայն հավելված N 6-ի:

4. Սահմանել, որ Հանձնաժողովը իր աշխատանքները իրականացնում է սույն հրամանը ուժի մեջ մտնելու պահից մինչև 2015 թվականի դեկտեմբերի 30-ը:

5. Հայաստանի Հանրապետության առողջապահության նախարարության աշխատակազմի պետական առողջապահական գործակալության պետ Ս.Ծատուրյանին՝

1) բժշկական կազմակերպություններում բժշկական օգնության և սպասարկման պետական պատվերի տեղադրման պայմանագրերի կնքման գործընթացում հիմք ընդունել Հանձնաժողովի կողմից կայացրած որոշումների արդյունքներով ընդունված Հայաստանի Հանրապետության առողջապահության նախարարի հրամանները:

6. Հայաստանի Հանրապետության առողջապահության նախարարության աշխատակազմի ղեկավար Արմեն Կարապետյանին՝

1) հիմք ընդունելով Հայաստանի Հանրապետության քաղաքացիական օրենսգրքի 443-րդ հոդվածի 1-ին մասը կազմակերպել զանգվածային լրատվության տպագիր միջոցներում սույն հրամանի 3-րդ կետի 3-րդ ենթակետով սահմանված պետության կողմից երաշխավորված հիվանդանոցային բժշկական օգնության և սպասարկման ծառայությունների մատուցման պայմանագրերի առանձին օրինակելի պայմանների հրապարակումը:

7. Հայաստանի Հանրապետության առողջապահության նախարարության աշխատակազմի քարտուղարության պետ Զ.Դարբինյանին՝

1) ապահովել ՀՀ մարզպետների, Երևանի քաղաքապետի, ինչպես նաև բժշկական կազմակերպությունների կողմից ներկայացված բժշկական օգնության և սպասարկման պետական պատվերի հայտերի և դրանց կից փաստաթղթերի ժամանակին տրամադրումը ՀՀ առողջապահության նախարարի տեղակալներին և Հանձնաժողովի անդամներին:

8. Հայաստանի Հանրապետության առողջապահության նախարարության աշխատակազմի հասարակայնության հետ կապերի բաժնի պետ Լ.Բաբախանյանին՝ սույն հրամանը տեղադրել Հայաստանի Հանրապետության առողջապահության նախարարության պաշտոնական կայքում:

9. Սույն հրամանի կատարման հսկողությունը հանձնարարել Հայաստանի Հանրապետության առողջապահության նախարարության աշխատակազմի ղեկավար Ա.Կարապետյանին:

Ա.ՄՈՒՐԱԴՅԱՆ